



**Bellum Sacrum Ecclesiae Militantis Contra Turcum
Communem Hostem Christianorum**

Vaux, Léonard de

Leodii, 1685

Numerus XVIII. Tres Supplicationes Christianæ; Prima ad Sanctissimam Trinitatem, unum Deum Creatorem omnium: Altera ad unum Mediatorem dei & hominum, Jesum-Christum Deum Hominem, omnium Redemptorem:

...

[urn:nbn:de:hbz:466:1-64991](https://nbn-resolving.org/urn:nbn:de:hbz:466:1-64991)

NUMERUS XVIII.

Tres Supplicationes Christiana; Prima ad Sanctissimam Trinitatem, unum Deum Creatorem omnium: Altera ad unum Mediatorem Dei & hominum, JESUM-CHRISTUM Deum-Hominem, omnium Redemptorem: Tertia ad Sanctam Dei Genitricem, semper Virginem Immaculatam MARIAM omnium Christianorum, Parentem, Advocatam, & Mediatricem apud Filium suum, quam ipsemet dedit omnibus in Matrem.

§. I.

ORATIO AD SANCTISSIMAM
TRINITATEM.

Sanctissima & indivisa Trinitas, una Deitas; Deus, unus, trinus; Pater, Filius, Spiritus Sanctus; unus Deus creator

omnium : omnes Christianos, præfertim Principes Catholicos, sub uno Capite totius Ecclesiæ, in uno spiritu veritatis, & charitatis, sic conjunge; ut simul unum corpus indivisum constituent: & unanimes, læti & alacres, constanter pro corona æternæ Gloriæ, præliantur prælium Domini; prælium Regis Regum Christi JESU, prælium Sanctissimæ Triadis, Patris, Filii, & Spiritus Sancti. Sic ô Trinitas Divina, ubique terrarum te unum Deum in substantia, trinum in Personis adorabimus, in spiritu pietatis & veritate fidei Catholicæ; tibi serviemus humero uno, uno corde, & uno ore: ubique tibi psallemus, ubique agemus jubilæum, cùm Terra Sancta totusque orbis ad pristinam fidem, ad pristinum herum & Dominum suum revertetur: ubique, tibi Deo, uni, trino, in linguæ novæ mentisque jubilo, exultantibus animis, & vocibus jubilabimus, psallentes in unum, Sanctus, Sanctus, Sanctus, Deus, unus, & trinus: Gloria Patri, & Filio, & Spiritui Sancto. Hocce fidelium omnium, hoc meum unicum est

votum, quod mihi ab olim, ô Sanctis-
 sima Trinitas & una Deitas inspirasti,
 & inspirare non desinis; ut assidue de-
 siderem, & obsecrem te, pro excidio
 Mahometismi, Hæresis, & Paganis-
 mi. Utinam ô omnipotentissima Tri-
 nitas, triplicem horum tuorum ho-
 stium ruinam ante mortem videre me
 contingat, ut toto orbe sit unum
 Christi ovile, & unus Pastor, tunc
 utique lætus occumbam, canamque
 & jubilabo cum Sancto Simeone. Nunc
 „ dimittis servum tuum Domine, se-
 „ cundum verbum tuum in pace. Quia
 „ viderunt oculi mei salutare tuum;
 „ quod parasti ante faciem omnium po-
 „ pulorum: Lumen ad revelationem,
 „ gentium & gloriam plebis tuæ Israël.
 Tunc pariter occinet discipulus quem
 diligebat JESUS, Vidi Sanctam Civita-
 tem Jerusalem, novam descendentem
 de Coelo à Deo, paratam sicut spon-
 sam ornatam viro suo: Tunc modula-
 bitur Tobias illud c. 13. Jerusalem Ci-
 vitas Dei, luce splendidâ fulgebis, &
 omnes fines terræ adorabunt te. Be-
 neditus Dominus qui exaltavit eam,
 & sit regnum ejus in sæcula sæculorum
 super

super eam, Amen. Tunc rursus psal-
 let Regius Vates, Omnes gentes plau-
 dite manibus, jubilate Deo in voce
 exultationis. Elegit nobis hæredita-
 tem suam speciem Jacob quam dilexit
 magnus Dominus, & laudabilis ni-
 mis, in Civitate Dei nostri, in monte
 sancto ejus. Fundatur exultatione,
 universæ terræ, mons Sion, latera
 Aquilonis, Civitas Regis magni, Deus
 in domibus ejus cognoscetur, cum
 suscipiet eam. Lætentur Cæli, &
 exultet terra, commoveatur mare &
 plenitudo ejus. Dominus regnavit,
 exultet terra, lætentur insulæ multæ:
 adore eum omnes Angeli ejus, au-
 divit & lætata est Sion, exultaverunt
 filiæ Judæ, propter judicia tua Domi-
 ne, viderunt omnes fines terræ salutare
 Dei nostri: omnis spiritus laudet Do-
 minum. Tunc exultabit Isaias: Lau-
 date Cæli quoniam misericordiam fe-
 cit Dominus: jubilate extrema terræ,
 resonate montes laudationem, quia
 consolatus est Dominus, populum
 suum, & pauperum suorum misere-
 bitur.

Surge illuminare Jerusalem, quis

N

venit lumen tuum, & gloria Domini super te orta est, & ambulabunt gentes in lumine tuo, & Reges in splendore ortus tui. Tunc buccinabit Sophonias: Lauda filia Sion, jubila Israël, lætare, & exulta in omni corde filia Jerusalem. Abstulit Dominus iudicium tuum, avertit inimicos tuos; Rex Israël, & Dominus in medio tui, gaudebit super te in lætitia, filebit in dilectione sua, exultabit super te in laude. Tunc jubilabit Zacharias, Exulta satis filia Sion, jubila filia Jerusalem, ecce Rex tuus veniet, tibi justus & Salvator, quia lapides sancti elevabuntur super terram ejus. Quid enim bonum ejus est, & quid pulchrum ejus, nisi frumentum electorum, & vinum germinans Virgines?

§. II.

ORATIO AD JESUM-
CHRISTUM.

Domine mi JESU-CHRISTE Salvator omnium hominum maximè fidelium, solus Deus - Homo, Media-

tor Dei & hominum, qui dedisti
 temetipsum redemptionem pro omni-
 bus, semper vivens ad interpellan-
 dum pro nobis, qui pro omnium salu-
 te sanguinem tuum fudisti, volens
 omnes homines salvos fieri, nolens
 aliquem perire; tu es Advocatus no-
 ster apud Patrem, tu es propitiatio
 pro peccatis nostris, non pro nostris
 autem tantum, sed & pro totius mun-
 di. Tu ipse ore tuo Sacro-Sancto, Pa-
 trem pro nobis precando dixisti: Hæc
 est vita æterna, ut cognoscant te so-
 lum Deum verum, & quem misisti
 JESUM-CHRISTUM: ideo cum
 in forma Dei esses exinativisti temet-
 ipsum formam servi accipiens, & fa-
 ctus es obediens usque ad mortem Cru-
 cis, ut exaltatus à terrâ omnia corda
 traheres ad teipsum, ut omnis qui cre-
 dit in te, in te sperat, te invocat, te
 diligit, & sequitur te usque in finem,
 non pereat, sed habeat vitam æternam
 per te: de cujus plenitudine nos omnes
 accepimus, gratiam pro gratia. Ideo
 Pater tuus exaltavit te, & dedit tibi
 nomen quod est super omne nomen,
 ut in nomine tuo JESU flectatur om-

ne genu, cælestium, terrestrium & infernorum, & omnis lingua confiteatur, quia Dominus JESUS-CHRISTUS, victor omnium per crucem suam, in gloria est Dei Patris. Postula ergo à Patre, & dabit tibi omnes gentes hæreditatem tuam, & possessionem tuam terminos terræ, & dicetur ubique terrarum in nationibus, regnavit à ligno Deus-Homo. Alleluia laudate Dominum.

§. III.

ALLOQUIUM AD DEI
GENITRICEM.

U quoque, semper Immaculata, semper Virgo, gratiâ plena ab initio, Sancta Dei Genitrix **MARIA**; inter omnes puras creaturas Benedicta, & Beatissima; tu Patris æterni Filia primogenita, Verbi Incarnati in te, & de te, sola vera Parens, Dei Genitrix **MARIA**, Spiritus Sancti Sponsa, Sanctuarium animatum Sanctissimæ Triadis; tu sola cunctas hæreses interemisti in univer-

so mundo : Has quoque nostri ævi interime ; affere tibi Terram Sanctam , quasi tuum Natale solum ; affere Hungariam olim tibi clientem & supplicem , ideoque regnum Virginis nuncupatam : affere cæteras Provincias , quia cunctarum es Regina & Domina ; omnibus misericordiæ tuæ sinum aperias , ut de plenitudine tua accipiant universi : multæ siquidem Filix Dei , animæ Sanctæ , congregaverunt sibi & suis divitias spirituales , tu sola supergressa es universas , nihilque nos gratiarum Filii tui , Deus , unus , trinus , habere voluit , quod per manus tuas non transfiret : ô Advocata , & Mediatrix omnium apud Mediatorem nostrum **JESUM** , qui in Cruce moriens pro omnibus , te omnibus dedit in Matrem ! cùm ergo Cœli & terræ sis Domina & Regina , Mater misericordiæ , vita dulcedo , & spes nostra , illos tuos misericordes oculos ad nos omnes converte ; nec modò sentiant tuum juvamen qui te invocant , sed ipsi infideles , qui te vel non norunt , vel etiam contemnunt , per te veniant ad lucem veræ fidei : ut illuminati San-

Etissimam Trinitatem, Deum, unum, trinum, omnium Creatorem & conservatorem, principium & finem agnoscant & adorent in spiritu & veritate, in **JESUM-CHRISTUM** verum Deum & hominem Salvatorem, omnium hominum credant illum equalem; coæternum, & consubstantialem Patri secundum Divinitatem; minorem verò Patre secundum humanitatem: confiteantur, & prædicent nobiscum nomen ejus, omnibus qui illum invocant, salutare.

Te etiam, ô Sancta Virgo Dei Mater **MARIA**, venerentur, diligant, invocent omnes gentes, per quam salus mundi, Salvator omnium **JESUS**, unigenitus tuus credentibus apparuit: Tu enim ut ait Cyrillus Homilia.6. contra Nestorium, sacrilegum tui Nominis, & summæ tuæ dignitatis ac gloriæ hostem; Tu ô Cœli terræque Regina es pretiosa illa Margarita orbis terrarum, tu lucerna extincti luminis, corona Virginitatis, sceptrum Orthodoxæ fidei, Templum indissolubile, continens eum, qui nusquam contineri potest: Mater & Virgo. Per te Trinitas Divina sanctificatur, per te

cruce Christi pretiosa dicitur, & adoratur, per te exultat Cœlum, lætantur Angeli & Archangeli. Fugantur Dæmones, & homo ipse ad Cœlum revocatur; omnis creatura idolorum errore detenta conversa est per te ad notitiam veritatis; & in toto orbe terrarum, Deo, uni, trino, constructæ sunt Ecclesiæ: te adjutrice gentes veniant ad pœnitentiam, per te unigenitus Dei Filius, vera illa lux effulsit sedentibus in tenebris & umbra mortis.

Te Prophetæ prænuñciarunt, te Apostoli summis laudibus celebraverunt: eisdem ferè verbis, divus Bernardus totus **JESU & MARIÆ**, te ô Dei Genitrix Virgo, ut Matrem misericordiæ omnibus datam, in Advocatam, & Mediaticem apud Mediatorem unigenitum sinus tui, salutat, & invocat, omnium fidelium Nomine, his verbis, quibus obturat ora rugientium Leonum, Hæreticorum, inquam nostri temporis, qui non cessant Sanctissimam Dei Genitricem, & ejus cultum blasphemantes maledico dente carpere. Audiant eximium hunc &

pietissimum Ecclesiæ Doctorem Ser-
mo 6. ad illa verba *Apocal.* 12. Signum
magnum apparuit in Cœlo, mulier
amicta Sole, & Luna sub pedibus ejus,
& in Capite illius corona Stellarum
duodecim.

Vehementer quidem nobis vir unus
& mulier una nocuere: inquit, sed
gratias Deo, per unum nihilominus
Virum, & per Mulierem unam omnia
restaurantur, non sine magno fœno-
re gratiarum; neque enim sicut deli-
ctum ita & donum, sed excedit dam-
ni æstimationem beneficii magnitudo:
M A R I A omnibus omnia facta est,
sapiens & insipientibus, copiosa
charitate debitricem se fecit, omnibus
misericordiæ sinum aperit: ut de ple-
nitudine ejus accipiant universi.

Captivus redemptionem, æger cu-
rationem, tristis consolationem, pec-
cator veniam, justus gratiam, Ange-
lus lætitiâ: denique tota Trinitas,
gloriam, Filii Persona Carnis humanæ
substantiam, ut non sit qui se abscon-
dat à calore charitatis ejus.

Salve ergo mundi Domina, Cœli
& terræ Regina, Angelorum & homi-

num gloria; salve Regina Sanctorum
 omnium: salve Virgo Virginum, Stel-
 la matutina, tota plena gratiâ in quam
 tota se infundit plenitudo gratiarum;
 mundi Christiani, in auxilium Do-
 mina festina: tu terribilis es principi-
 bus tenebrarum, sicut castrorum acies
 ordinata, contêre omnes fidei Catho-
 licæ inimicos. Quæ sola cunctas hæ-
 reses interemisti in universo mundo, si-
 cut sola in initio viarum tuarum à prin-
 cipio, Immaculatæ Conceptionis tuæ
 in utero Beatæ Annæ Genitricis tuæ;
 in primo illo momento creationis &
 infusionis Sanctissimæ animæ tuæ, in
 Sacrum & semper Virgineum Corpus
 tuum, Divinæ Triadis Sanctuarium;
 tu sola caput superbi serpentis, tota
 clara luce Divinâ & charitate ignita
 contrivisti. Salve solis justitiæ aurora,
 cujus splendoribus irradiata, Magos
 ab Oriente, primitias gentium, ad
 Filii tui cunabula attraxisti, & adoran-
 dum exhibuisti primis illis veris ado-
 ratoribus in spiritu & veritate. Per te
 ô Benedicta & Beatissima inter omnes,
 per Benedictum Fructum Virginei
 Ventris tui, populus qui sedebat in

tenebris, vidit lucem magnam: & gloria Domini super Sanctam Civitatem Jerusalem orta est, tu enim fecisti ut in cœlestibus oriretur lumen indeficiens; lux vera Verbum Patris luminum, spirans amorem Sanctum, lux Æterna quæ illuminat omnem hominem venientem in hunc mundum.

Dirige ergo universos & singulos ô inclita Maris Stella! MARIA Domina illuminata & illuminans: succurre orbi in abyssum erroris & iniquitatis, ac subindè æternæ damnationis ruenti. Ecce innumeræ nationes, Indorum, Turcorum, Mahometanorum, Paganorum, Judæorum & Hæreticorum ac infidelium, per totum orbem diffusæ: inter æstuantes hujus sæculi turbines, inter scopulos hujus mundi iniquissimi, in maligno positi non navigant, fluctuantes in procellis feri maris, sed submerguntur & demerguntur in profundum Inferni Barathrum.

Tu igitur ô potentissima & clementissima Domina! Mater misericordiae succurre miseris, dirige omnes gentes JESU-CHRISTI Filii tui

Sanguine redemptas; recto cursu ad Orthodoxæ fidei veritatem, ad veram justitiam & sanctitatem, ut tandem cum fidelibus, adoratoribus Dei ad æternæ salutis portum, te duce perveniant.

Cæterùm sicut Unigenitus tuus, omnes vult, ad agnitionem veritatis venire, omnes homines vult salvos fieri, neminem vult perire, qui salvandis omnibus venit; sic tamen est Salvator omnium hominum, ut sit maximè Salvator fidelium, qui in illum credunt; & qui in illo renati, illum diligunt & sequuntur usque in finem. Sic tu etiam ô Mater cunctorum viventium, qui ut Mater Salvatoris omnium hominum, vis omnes homines salvos fieri & ad agnitionem veritatis venire: monstra te maximè Matrem, monstrantium se tuos cupere esse filios, pios, castos, obedientes: impetra per potentissimas tuas ad Filium preces, obtine nobis omnibus, magnam ejus gratiam, ut Deum, unum, trinum, in Spiritu Sancti amoris ac timoris, & veritate fidei Orthodoxæ adoremus; ut **JESUM-CHRISTUM**

verum Deum, & verum hominem
Salvatorem nostrum credentes, dili-
gamus, & sequamur per viam Re-
giam salutis usque in finem vitæ hu-
jus mortalis: & sic tandem illum te-
cum ô Dei Genitrix; semper Imma-
culata, semper Virgo, verè Deipara
M A R I A, Regina Sanctorum om-
nium; videamus facie ad faciem: &
illo in Æternum fruamur, in Gloria
Patris, cum quo vivit & regnat in uni-
tate Spiritus Sancti Deus. In quem de-
siderant Angeli prospicere, per om-
nia sæcula Beatæ Æternitatis: ut sit
solus Deus, unus, trinus, omnia in
omnibus.

